



**KEMENTERIAN PEMBANGUNAN
USAHAWAN DAN KOPERASI**
Ministry of Entrepreneur Development and Cooperatives

KENYATAAN MEDIA MENTERI PEMBANGUNAN USAHAWAN DAN KOPERASI

INSKEN LANCAR SISTEM UJIAN PSIKOMETRIK MYNEPT BAGI USAHAWAN KENALPASTI KEBOLEHAN DIRI

KUALA LUMPUR, 14 SEPTEMBER 2020 – Institut Keusahawanan Negara Berhad (INSKEN) melancarkan sistem Ujian Psikometrik Usahawan Nasional yang dikenali sebagai MyNEPT bagi membantu usahawan serta bakal usahawan mengenali kecenderungan diri dan ciri-ciri sifat individu untuk menjadi seorang usahawan yang berjaya.

Sistem yang dibangunkan oleh INSKEN ini memberi peluang kepada para usahawan mengukur tahap ciri-ciri yang ada pada diri mereka selain dapat mempersiapkan para usahawan mendepani cabaran Revolusi Industri Keempat (IR4.0).

Menteri Pembangunan Usahawan dan Koperasi, YB Dato Sri Dr. Haji Wan Junaidi bin Tuanku Jaafar berkata, MyNEPT dibangunkan bagi membantu para usahawan mengenali ciri-ciri atau personaliti keusahawanan yang ada pada diri mereka untuk dijadikan sebagai penanda aras kepada tahap keusahawanan sedia ada dengan perbandingan paras nasional dan antarabangsa.

Jelasnya, para usahawan boleh membuat perbandingan skor dengan usahawan tempatan dan global yang telah berjaya. Perbandingan skor ini sudah pasti dapat membantu mereka untuk mengenalpasti penambahbaikan bersesuaian bagi mengembangkan perniagaan sedia ada berdasarkan kedudukan mereka didalam graf dan skor yang dijana oleh MyNEPT.

Sementara itu, menurut Ketua Pegawai Eksekutif INSKEN, Encik Muhd Firdaus Azharuddin, sehingga ke hari ini seramai 10 ribu usahawan telah mengambil ujian psikometrik MyNEPT dan disasarkan bilangan itu akan melonjak ke 100,000 usahawan dalam masa terdekat.

Dalam pada itu, terdapat 50 soalan yang wajib dijawab oleh para usahawan sebelum keputusan dan laporan psikometrik MyNEPT ini dijana. Soalan-soalan psikometrik tersebut adalah berdasarkan lima skop analisa yang dikenali sebagai O.C.E.A.N iaitu:

- **Openness to experience** atau keterbukaan, merupakan ciri personaliti yang gemar mencari pengalaman dan pengetahuan baharu.
- **Conscientiousness** atau sifat berhati-hati. Ia merangkumi ketelitian, cermat dan berdisiplin.
- **Extraversion** atau mudah bergaul. Sifat mencari kepuasan dari sumber-sumber di luar diri sendiri atau dalam komuniti.
- **Agreeableness** atau sifat menyenangkan. Menggambarkan kebolehan individu untuk mengadaptasi dengan persekitaran.
- **Neuroticisme** dimana kecenderungan individu untuk mengalami emosi negatif seperti marah, bimbang atau kemurungan. Ia juga dikenali sebagai ketidakstabilan emosi.

Oleh yang demikian, kesemua usahawan dialu-alukan untuk melayari pautan <https://www.mynept.com/> bagi membolehkan mereka mendapat keputusan ujian psikometrik MyNEPT secara percuma sekaligus mengenalpasti kelemahan sedia ada.

Hadir sama dalam pelancaran sistem MyNEPT adalah, Timbalan Menteri Pembangunan Usahawan dan Koperasi, YB Datuk Wira Hajah Mas Ermieyati Bin Samsudin dan Ketua Setiausaha Kementerian Pembangunan Usahawan dan Koperasi, YBhg. Dato' Sri Haji Mohammad bin Mentek.

DATO SRI DR. HAJI WAN JUNAIDI TUANKU JAAFAR
MENTERI PEMBANGUNAN USAHAWAN DAN KOPERASI